

19

D I T I O N E S
G A S T I N E N S I V M,
E T
S E N O N V M;

Gallice

G A S T I N O I S & S E N O N O I S.



Hanc partes dixi
esse: Comitatum Pa-
risiensem, Ducatum
Valesium, Ditione-
que Heurepensem
& Gastinensem.
Horum Ditione, vulgo
Gastinois, ab Heure-
pensi separatur Ve-
rina fluvio. Compre-

hendit sub se Ducatum Stampensem, Nemurcen-
sem, & Comitatum Rupisfortis, & alios.

Ducatus
Stampensis.

Stampæ, *Estampes* vulgo, medio inter Lute-
tiam Parisiorum & Genabum Aurelianensium
itinere, ad Iunnam fluvium cernitur, qui cam-
marorum (pisces sunt delicatissimi) parens lar-
gus ad Corbolum in Sequanam se exonerat.
Urbs undequaque montibus cincta ac immersa
jacet, ut non nisi cominus ab adventantibus
spectari possit. In unam longam plateam ex-
tenditur, quæ sola fere urbem constituit. Tem-
plum habet honori D. Mariæ sacrum. *Stampa-*
rum meminerunt Aimoinus & Gregorius Turo-
nensis. Stampensis pagus est apud Nithardum.
de Dissensionibus filiorum Lodovici Pii lib. 1.
Stampense etiam Concilium nominatur apud
Ivonem. Olim Comitatus fuit, verum Duca-
tum fecit Franciscus I. Memoratur in Annali-
bus Franciæ Philippus Nivernii, Rhetelli, &
Estampii Comes, Philippi Valesii Burgundiæ
Ducis filius, qui cum fratre in pugna Azyncur-
tiana cecidit: successores nactus filios, in Nivei-
nensi quidem & Rhetellano Comitatu Caro-
lum, in *Stampano* autem Iohannem, qui fratre si-
ne liberis defuncto reliquos quoque Principa-
tus est adeptus.

Nemursum.

Nemursum, *Nemours*, oppidum est ad Lonium
flumen, quod paulo infra Moretum Sequanæ
concurrat. Inter Ducatus Franciæ etiam non
postremi loci. Vixit nuper Philippus Sabanaus,
Nemursii Dux, cuius filia Ioanna secundo loco
nupsit Nicolao Lotharingio, Duci Mercu-
rio, Marchioni Nomeney, & Vandalimontis
Comiti.

Gallia;

Rupis-fortis, Gallis *Roche-fort*, Comitatus gau-
der titulo. Loco parum esse aut nihil antiqui-
tatis, ipsum docet nomen, nisi transnominatio-
num frequentia sit passim admittenda.

Rupis-for-
tis.
Roche-fort.

In Gastinensem quoque ditione cum *Millio*
& *Moreto* (quod limes Gastinenses inter & Heu-
repenses) utroque arce munito, aliisque oppidis,
est *Montargium*, quasi *mons Argi*, ut quidam ratio-
cinantur; quod in circuitu aspectus ejus procul
extendatur. *Galli Montargis* vocant. Incendio va-
statum circa annum 1518, postea renovatum
fuit. Arcem & hoc habet, in qua depicta visi-
tur historia canis venatici, qui heri sui mortem
vindicans, occiso eo, qui necem illi attulerat.
Adscribam historiam verbis ac fide Iulii Cæsa-
ris Scaligeri, qui ita narrat: *Offensus amici sive po-*
tentia sive perfidia quidam Regis aulicus, cum ex insidiis
obtruncat, atque in avio agro sepelitur. Venaticus canis
ibi tum forte comes hero fuerat, is amore victus, diu se-
dit in tumulo. Posteaquam fames pietatem superavit, at-
que in aulam sine domino reversus est, rati illius contu-
bernales, bestiam temere vagari, cibum ei dari jubent.
Satur ille ad tumulum redit; it, redit toties, ut primum
suspicio invaderet animos incerta quædam ac fluctuans:
mox etiam certi esse sibi viderentur, heri id fieri desiderio.
Abeuntem persecuti, deprehenso telluris tumore, effossam
cadaver atque agnitum afficiunt sepultura. Canis, exe-
quitis peractis, socius fit eorum, quibus fuerat dux ad
investigandum. Tandem aliquando in aulam ubi homici-
da redisset: eum canis conspicatus, magnis ilico editis la-
tratibus, agre ab impetu cohibetur, quo tanquam indice
aucta suspicio, in multorum animis certa fides evasit. Cete-
rum bestia perseverantia in illius odio atque persecutione,
etiam regem movit, ut juberet hominem causam dicere.
Ille negare factum, persistere in inficiatione. Canis ejus
orationem latratibus atque assultibus obturbare, ut eam
interpellationem pro facinoris exprobratione, quotquot
aderant, interpretarentur. Eo res deducta est, ut jussu
regis homicida cum provocatore singulari certamine dimi-
caret. Picta est canis victoria in cænaculo quodam regio.
Pictura vetustate diluvior atque obscurior facta, regum
mandato semel atque iterum instaurata est. Digna pror-
sus Gallica magnanimitate, quæ are fusili assequatur per-
petuitatem.

S

SENO-